

求恕齋
叢書

雪橋詩話三集

十一

雪橋詩話三集卷第十一

遼陽楊鍾義撰集

吳興劉承幹參校

權文公與縣君同朝輿慶宮卽事句云合卺交歡二十
年今朝比翼共朝天道光二年冊封佟雅皇后長懋亭
相國充正使英煦齋和副之王妃命婦應行慶賀協
揆妻薩克達夫人素有足疾不能行六肅禮奉諭徑詣
皇后宮行家庭禮是日早朝偕入東華門程春海舉載
之故事取其詩句爲作比翼朝天圖與載之奉行冊禮
情事恰合薩克達夫人字介文善繪事初娶時理鍼術

以佐夜讀吳興孫勉亭爲寫秋鐙伴讀圖其後黃左田
又重寫夜鐙清課圖皆紀實也唐陶山嘗館於其家又
同成進士爲題秋鐙伴讀圖云讀書如治絲寸累積尋
丈讀書如繡希五采紛在掌煦齋敏好學始則凍而紡
繼且朱綠之黼黻足觀象同日歌霓裳龔官媿蕊榜君
擁飛霞佩層霄立可上迺出秋鐙圖告余以疇曩六齡
就外傳經籍誦高朗八齡通句律十齡解寄象十三善
騎射豪情慕倜儻先人督責嚴折節事誠讜每從溫清
餘佔畢開書幌晝閒提甕人短檠篝對幌洛詠逾夜分
佐之鍼翦響天吳紫鳳成問安當昧爽今雖獲一第北

堂慰鞠養迴思燕翼恩春秋愴盼嚮先生志斯幘以規
勿以獎余聞三歎息君方抽繭益七襄成報章樂羊志
彌廣況承母訓勞退直捧匭杖時乾隆癸丑相國初館
選也

五合朱瑋石父好詩與字率爾之筆好事者輒裝置屏
幃登臨贈答之什多收納罌中道光甲申摘存爲獨行
堂詩鈔二卷遣興作云齒髮不親肉悵然嗟我衰鏡中
頻念汝身後復爲誰直木風多厲黃花秋更遲此情如
飲水冷暖只心知蓋有不能自己於懷者其案上帖三
首云歐公勁險褚公柔分寫蘭亭迴不侔頰上添豪蕉

畫雪精神莫在似中求妙手摩空老斲輪涪翁波撇自
天真漏痕釵股分明在可惜元珠誤後人鎔金純火一
鑪青埽盡規撫出性靈五百年來書種子瓣香心折董
華亭自道其學書所得也同時李琪元朗亦好爲詩有
少山詩鈔石甫月夜同李少山散步江上遇目有作云
微風木葉下林月光已盈交歡愜所適共此江上行孤
村霧徐合遠火煙微明晤言契元賞延景有餘清田父
沽酒歸稚子牽衣迎隔水不知路遙聞叩柴荆棲鳥如
舊識飛飛向我鳴同聲感儔匹旣往眷余情閒適之趣
足滌塵襟

伊耐圖太常官寧遠州牧有惠政鍾仰山少宰生於州
署越卅載道光丁亥仰山之陪京禮部侍郎任州人迎
至山海關並言先公德政爭餉酒食焚香迎送者數千
人及召還道經其地亦如之明年屬朱野雲寫浮青山
館圖仰山兒時寄名浮青道院因以自號至是爲修葺
焉朱椒堂有記吳子山陸祁孫皆有詩

惠州野吏亭爲宋陳文惠公建道光丙戌遭颶風傾圮
雲巖太守恆山率屬重修有詩紀事未幾引疾回京黃
霽青和其見寄詩送行云首春共芳筵時鳥聲尙咽方
欣把袂新惘惘遽告別照荷鄰壁光交重文字結詩人

秉中和治術妙施設行覘九里濶勇特眾流截痼疾本
煙霞安用文七發矯翮去翮然鶴峰高獨絕驚城駕熊
軾六度春花紅低頭陳文惠躡跡蘇長公眷茲啟行日
攀留到轅童陸裝未能辦顏巷依然窮歧言粹如玉蔭
穀無豐凶弗待志乘搜口碑當銘功雲巖詩用蘇文忠
別徐州韻也惜原作未見

邳縣蛾眉山乃兩小山東西對峙粲若列眉蘇文忠文
定窆其東山之麓中奉明允衣冠爲虛冢迨過六子咸
東西附甲申闖賊憑陵破穴伐木章邱張篤行於順治
丙戌重爲修築墓西南百步爲廣慶寺前殿供佛後爲

祠堂祀三先生嘉慶癸酉豫大饑僧不能守近村飢民
樵林發屋遂益破壞墓有田七頃給僧僧無牛具不能
耕亦蕪穢不治道光癸未吳巢松按試臨汝聞其事歸
以告之陳梓庭中丞楊海梁方伯卽捐俸千五百金復
募金數千屬邑宰庀而新之工畢之日郝寶兩邑令俱
會於新祠展祀以妥神士女和會羅拜庭下者蓋萬人
巢松有長歌紀其事

無錫鄒鍾泉中丞鳴鶴哀輯先世手墨得靜嶽中翰治
乾卦說海嶽修撰忠倚請建常平倉疏君子懷德論黎
眉徵君顯曾梅邨倡和詩草合裝一冊邵子山時同官

中州題詩其後有云飲易仲翔真負癖說經輔嗣與齊
名語關家國苞桑計詩譜琵琶老淚聲道光辛丑河決
祥符之張灣直趨省垣中丞以素習河事權郡符撻石
投埽水勢卻退時有議遷省城於洛陽者設六難持不
可著開封守城記略林文忠方留河上用柏梁體爲詩
美之凡五十韻咸豐初用大臣薦由江西督糧尹京兆
巡廣西以不及援全州落職協守江寧城破殉節本朝
予謚最矜重林文忠嘗言生平所服膺爲礪堂蔣公蔣
公好薦士布滿中外多爲名臣而以微譴未蒙易名之
典士論弗慊中丞死事十五年曾文正疏請予謚以朱

御史鎮疏寢前旨有白其誣者乃賜卹如例謚壯節予
世職焉其絕命詞有曰太倉半粒粟滄海一微塵人生
百年耳忠盡仁乃純詩文集曰世忠堂其大節由於素
定也

鈕非石吳縣布衣家莫釐峰下精於小學著有段注說
文訂并說文新增考善音律江左士大夫家讌會無虛
日歌者滿堂必延之上座手執壇板爲顧誤焉曹葛民
廣文詩洞庭西去片颿斜綠樹深藏處士家想見白頭
饒醉態一鐙夜雨唱琵琶

崧亭方伯岳良爲達齋尙書玉德子官皖臬時和陸祁

孫餞秋四首云長天一夜疊江波側影驚看雁陣過婉
轉又逢將別候依然無奈此愁何閒尋落葉生惆悵淨
洗疏桐待斲磨手奉寒漿階下醅願求白帝慰留他笑
蓉已老鏡中顏脈脈無情水一彎送酒不嫌來遠市閉
門彷彿在深山記曾豔影銷金谷又見征車返玉關灑
掃軒窗勤堵塞霜風迎得朔風還黃花一幅寫常留月
下鐙前總是秋天際商聲傳木末海門餘怒息潮頭歐
陽作賦增悲興王粲登樓動遠愁好片平蕪頻試馬馳
驅誰去覓封侯盆植梅根古榦存小春時節續香魂自
尋煩惱原多事不惜流光亦寡恩夜永漸看樺燭短茶

餘微賸竹鑪溫如何來去渾無語空惹詩人有淚痕
孫稱其簿領堆中叢帙擁不成循吏不書生之句其崇
百藥齋三集道光八年方伯所爲刊版也

潘紱庭先生贈子章貝勒奕繪云昨詠高軒過今登大
雅堂詩宗韓吏部篆學蔡中郎愛士論真品觀書味古
香玉臺仙眷屬韻事共流芳謂太清夫人工詩畫也太
清顧氏字子春有集貝勒爲榮純親王孫榮府嘗自製
眞松煙墨光黑迥異微製姚文僖詩榮王好古法古製
支竈熬松成麝氣千槌萬杵苦費功工多質良自矜貴
持磨古硯暱相受濃不增膠清自黝含晴點漆妙各臻

元玉烏金世希有

麻城縣治西北十里有麻姑洞邑志載石趙時麻將軍
女得仙於此邑人祈雨輒應洞後小潭清不見底中有
小魚四足相傳龍子所化土人誤取以歸輒致雷雨桐
鄉陸費春帆中丞爲丹叔宗伯孫以明經宰麻城游麻
姑洞詩云十二層城近沈寥青松白石路迢迢山顛飛
閣黃金勝洞口行雲碧玉簫八景仙容示圓滿百盤人
語度岵巋到來便刻琅玕字直欲題名上九霄香臺杳
隔塵氛絕頂鐘聲下界聞陰澗鶴歸常帶雪古潭龍
臥不生雲神弦罷奏松房掩社鼓喧傳桂醕醺彷彿乘

驚江上月靈旗肅肅迓湘君中丞嘗與蔡浣霞結社京
師格律猶是唐音也光緒丁酉戊戌閒家君攝麻城篆
時予官京邸未獲一至其地邑人吳心陔侍御贈先大
夫楹語以爲民父母今得職之語相頌亦可見光黃閒
民情之厚

順德梁福草司務九圖自號十二石山人鴻臚僧寶之
尊人也少卽能詩土木懷古云從無婦寺能謀國徒有
公卿數上書三戶津云葛公亭北濁漳濱曾記東兵此
渡津一笑長城空萬里不知三戶已亡秦有人倫鑒李
若農侍郎幼孤貧一見決其不凡爲飲食教誨之越縵

侍御爲題仿鄭所南畫蘭冊云老筆出塵外閉門歌楚
些天懷想高澹詩思見萌芽空谷琴能語香叢石是家
應教五嶺畔不長素馨花思肖不畫土高風無與儔承
平根久著煙墨外何求海上夷花怒庭前帶草憂誰將
千畝茜自比富民侯

梁福草稱其同里吳華谿孝廉炳南工爲古文詞精畫
及星相王遁諸術詩如詠吳三桂云事去包胥空痛哭
時清樂布又縱橫文信國云諸伎滿堂甘一散二王航
海竟無成袁經略祠云秦王果見疑甘茂張浚曾聞殺
曲端固自長于論古

梅伯言七言短古如爲李寄雲題圖云先生卜築思平
谷清夢時時到雲木興來水墨寫山樵黃葉深深一茅
屋屋前流水舊漁磯流作春江更不回村村石樹山山
雨羨煞空濛一棹歸和張亨甫云尺五莊會共杯酒眾
客酣譁君落落別來江海飽軍聲詩膽輪囷壓鯨鱣新
陪季布入關西故人喜見翔金雞宿心雖了莫歸去好
賦西京燕喜詩孔繡山秦澹如招飲於尺五莊會者十
三人卽事作云蘆莖淺碧蒲芽短中有方塘白水滿開
軒對景弄春爵濠梁去人今不遠往來裙屐多歡場吾
輩亦復成徜徉座中醉客兼醒客總覺樽前是故鄉韓

齋稱爲不多著墨而自然有餘意者也晚依楊至堂河
帥詩文皆至堂爲之刊行至堂沒伯言亦逝于袁浦三
月廿一日爲其誕辰宗滌樓諸人設祭蒹葭簪皆有詩
文追悼之滌樓詩同譜能文章推君更無匹姚門失管
之李孝曾古筆遂衡逸助我二三友位西少
鶴諸子皆曾法乳繡
講習媿已晚漸染共丹漆爲道其淵源也

胡孟紳秋曹爲書農學士長子詩文雅贍其聽香齋集
有詠元史帝后冠制二首云元帝冠服制問名數逾廿
積蘇一色衣冠視服等級冬貴珥銀貂夏參用鉢笠紅
羅碧綠羅各色映袍裙或貫金鳳頂或嵌寶珠粒望若